

詩文要錄

獻縣詩文要錄卷三

接高宗純皇帝御選詩文凡皇帝之作皆列於本朝諸臣之先今用其例

清文

聖祖仁皇帝御製九河故道文

九河故道漢唐宋諸家之說不一或謂在濟南境內或謂遠界永平而酈道元謂九河苞淪於海以朕揆之其九河入海之處在今天津之直沽而九河故道不出滄景二三百里間也蓋水性就下今南北之水以天津爲尾閭地最窪下雖數千百年中或陵谷變遷而其高卑大勢南北定

位有必不可易者卽以禹貢之文考之可以斷矣禹貢曰
至於大伾北過泲水至於大陸又北播爲九河疏云大伾
屬魏郡黎陽泲水在信都大陸澤名夫黎陽今之濬縣信
都今之深州大陸澤在今之束鹿界而河間在濬縣深州
束鹿之北故曰又北也又九河旣道疏云平原以北平原
今德州境言德州以上也漢書溝洫志許商云九河之名
有徒駭胡蘇鬲津在成平東光鬲界中此三地今皆屬河
間杜氏通典云鈎盤在景馬頰覆金在趙郡景卽景州趙
郡今涿易南古所謂燕南趙北也輿地志云簡河在臨津
金史地理志云南皮縣有潔河太史河傳志所載九河故

道之在河間境也又豈不彰明備著乎則天津爲同爲逆
河入海之道無疑矣河自周定王時已南徙九河故迹亦
漸堙廢後人不能深究地勢多穿鑿傳會其指在濟南者
旣失之過南其指在永平者又失之過北而鄭康成據緯
書謂齊桓公填塞八河以拓疆界其說益滋譌謬耳凡人
讀書能據經文考以古今形勢則諸家之說自有折衷夫
河間古郡稱名已久其所以謂之河間者以其在九河之
間也顧名思義又可知矣

諭祭原任太子少保協辦大學士禮部尙書紀昀文

嘉慶十年

三台位亞軫夙望於元臣六藝身通眷方聞於耆宿藉大

廷之日贊新恩方賁黃麻愴夜壑之風淒遺疏遽聞綠野
憫茲篤棐薦以馨香爾原任太子少保協辦太學士禮部
尙書紀昀稟性淵通立身醇謹居藩國傳經之地業富縑
緗入崇臺市駿之場羣空驪駱鑿坡載筆是云克稱其官
黻辰書名聿見能殫厥識才程山右登唐魏之民風學董
閩中衍游楊之道脈備從臣而格躋常調轉儲隸而品擢
清班惟銅龍資審論之才斯竹馬寢承宣之命雁銜綬帶
寵賁儀章鳳刷羽毛榮留欽賜迨獲譴而鄭乘玉塞復承
恩而詔待金門嘉其綜括之多能畀以校讐之專責爾則
潛心考索銳意鉤稽能探濠上之五車不數河東之三篋

銀根勘誤玉格搜奇大典編成削稟溯昭陽之歲金書表
進臚函志元默之年集排總目以精詳簿續中經而賅洽
在天文之成化千萬禩無此鉅觀頌聖主之得賢一二臣
有茲盛遇以此恭勤之茂實宜邀優渥之殊施由端尹而
進直鑾臺自貳卿而總司烏府威生白簡西垣誇五入之
榮度著青儀南省懋再遷之績上明光而曳履入建禮以
鳴騶桃李眞屬之春官甲兵亦修夫夏職金繩衍策載襄
堯典之粵稽玉檢披華重紀周官之董正經猷益裕資望
兼隆屬以調鼎需賢卜甌進秩方賴元勳之平格用資朝
列之楷模何拜命之甫旬竟顏齡之莫駐禔之經被賻以

唐書卷之三
帑金爰思絳服之庸爲啟雕筵之奠嗚呼老成頻謝空期
壽耆之無遺文獻猶存佇見德言之不朽式頒綸綍用慰
幽靈

許汝霖北河聖功頌

子牙之源來自西南條派未易悉數大要惟滹沱與滏爲
眾流最而遠且險者莫過漳河按清漳發源樂平之少山
濁漳發源長子之鳩山分流至彰德之林縣而始合跡其
入直隸也成安曲周肥鄉廣平諸縣首受之南或衝衛北
奪諸河比年以來分爲四支一經魏縣元城至山東館陶
歸衛入運一經廣平至山東邱縣又分爲二一折而東經

威縣南宮棗強武邑故城景州阜城交河至青縣杜林村
與獻縣完固口之支流合一折而北經廣宗平鄉鉅鹿以
抵寧晉與淦河會夫淦水雖清性湍而熱南自磁州經直
隸之廣平郡漸達寧晉輔漳而流至冀州又合滹沱考滹
沱剽悍亦稱渾水西由繁峙入直隸之平山達於正定奔
騰涌伏漸抵冀州偕漳淦諸流共由衡水歷武邑武強入
獻縣完固口復爲兩支一由西南入單家橋合杜林村之
流至鮑家嘴歸運一由西北入臧家橋經河間大城爲子
牙河出王家口歸淀統而遡之歸運者三歸淀者一條分
脉散厥勢漸平議者欲合四支爲一過其入淀悉會注漕

創鑿新道以歸於海皇上洞燭其弊謂水勢合則猛分則弱今諸河分流若併歸運則漕道有妨併歸子牙河則屯田受害於是悉屏羣議特授方畧命大小臣遵行相度凡三支之歸運者先於上游除廣平諸邑之賦乘時捍禦隨於下流或濬或疏隨其性以達之使之不爲轉輸礙而一支之歸淀者臧家橋以下地狹而逼勢直而迅向使隄防無術春漲秋霪非溢則潰沿河八州縣其不被昏墊者幾何爰設河員不惜金錢數十萬於獻縣河間東西兩岸高築長隄西接大城東接青縣靜海雙堤屹然各二百餘里又於東堤廣福樓開清河以分其勢而子牙一帶驚濤駭

浪東行於兩堤內者直至王家口安流無恙廼以三分東
瀉支河逶迤趨淀以七分兩出文安復與順天保定河間
三郡各堤岸所匯之水蜿蜒而來東注於文安者合子牙
之東流同趨東北入淀以歸海由是而四支恬然各由其
道南不至合衛河以妨運北不至挾淦水滹沱以侵田聖
慮淵深誠非百執事所能窺萬一者矣舊志云按此頌及李文貞相國疏皆
在漳河未徙之前自康熙四十七年漳水全歸館陶入運
不復與滹會由是直隸非漳所經故怡賢親王畿南水利
疏備列諸水無一言及於漳也然水之遷徙無常既可
驅而去亦可不引而來故謹錄二篇以見其會流故道云
大學士李光第安覆漳河分流疏

臣等遵奉諭旨查看得現在漳河分爲四支一支自直隸

大名府之魏縣元城縣流至山東館陶縣地方歸衛入運
一支由直隸廣平縣至山東邱縣地方復分爲二其一俗
呼老漳河自邱縣東北分流經直隸之威縣南宮棗強景
州武邑阜城交河等地方至青縣杜林木村與完固口之
支流合至鮑家嘴歸運又其一俗呼小漳河亦自邱縣西
北分流經直隸之鉅鹿廣宗平鄉至寧晉與淦河會又經
東鹿冀州與滹沱河會由衡水至獻縣完固口復分爲兩
支一支自完固口流至青縣會老漳河至鮑家嘴歸運一
支經河間大城爲子牙河出王家口歸淀查漳河現在未
流所分四支三支歸運一支歸淀然歸運三支水勢頗弱

其歸淀一支水勢獨強約其水勢三支之水僅可以敵一支是則此時漳水一半歸運一半歸淀運道既無難受之虞子牙河亦得分殺之勢誠有如聖諭所云者臣等竊觀此時水勢惟經寧晉冀州會淦河滹沱河一支最爲深通其歸館陶及青縣入運之兩支水勢頗淺恐將來淤塞臣等議得應令所經由各地方官每年於水未發時分段挑濬臣等按季查視務令此兩支俱疏通無滯以殺小漳河之勢如遇水大時仍用挑水壩等法逼水分流庶幾北不至挾滹沱以侵田南不至合衛河以害運臣等愚陋之識未必有當伏乞皇上訓誨指示遵行

李光地請開河間府水田疏

竊惟河間府昔稱九河下流近代因運河堤岸南北橫亘出海之口更窄其水自西南來者大水如漳滏滹沱小水如大陸澤所受之水及正定諸山水皆合流并勢由獻縣河間經青縣靜海以入於淀而與十五河之水並出於西沽之一線源大末小勢易橫流是以直隸水道之宜講者惟河間爲最臣近因修子牙河及築大城河間獻縣等隄岸採摭見聞參考形勢此一帶原屬窪下水鄉雖復歲治隄防但足補苴萬一倘遇潰決仍付淹沒非有變通之策終非永賴之計查南方水田之法行之北方往往有效曩

者涿州水佔之田一畝鬻錢二百尙無售者後開爲水田
一畝典銀十兩卽今淀中浮居村莊歲收蒲稗菱藕之利
無旱嘆之憂其實生未嘗減於高地也臣愚謂靜海青縣
上下一帶水居之民正宜以此利導之其可興水田者教
之栽秧插稻之法其難以成田者則廣其蒲稗菱藕之利
使民資水以爲利則不患水之爲害矣至於獻縣交河等
與正定接壤之處係鹽河之上游若能修治溝洫雜興水
田則水勢漸分將下流之水勢亦日減是資水之利卽除
水之害也然舉行方始若非有熟識情形歷經試用之人
使之實心任事恐託之空言無裨聖政查管河同知許天

馥籍貫江南諳曉農事現居河職源委周知前曾任文安知縣教民修治水田聞此數年文安水田殆且半縣乞皇上將許天馥特授河間府知府卽令於職事之暇興舉水利三年之後課其成效以爲功過或有微績以廣聖世愛養之方於萬一也伏乞睿鑒施行

怡賢親王畿輔西南水利疏

臣伏查京西一帶諸山實維太行之麓逶迤環拱遙衛神京水勢因之盡朝宗而左驚故自西北山而下者皆東南滙於兩淀自西南山而下者皆東北滙於大陸二泊兩道分流畢由東淀達直沽入海則是今日所歷諸河卽去冬

查勘河淀之上流也下流治乃可以導上流之歸亦必上
流清乃可以分下流之勢此相須而不偏廢者謹將勘過
情形并開挖疏引措置水田事宜爲我皇上敬陳之蘆溝
以西諸水拒馬其鉅流也發源山西廣昌之涑山東流至
房山鐵鎖崖分爲二派一派東入涿州過新城西南一派
南入涑水經定興歷楊村而東二派合流而爲白溝河他
若挾河琉璃河會於馬頭村爲馬頭河茨尾河廣陽水會
於石羊村爲牝牛河白玉塘西域寺甘池諸泉會爲胡良
河皆入焉馬頭牝牛二河雨多則溢雨少則涸均難資其
灌溉而牝牛一河又往往東決爲固霸諸邑害衝溜旣久

宛成河漕特以下無所歸以致泛濫田野應加疏濬導自
高橋以下入淀不惟固壩百里之內澇水有所收攝兼可
減白溝之流免雄縣淹沒之患矣惟胡良所經地稱膏腴
溝渠圩岸宛若江南擴而廣之房塚之間皆稻鄉也涑水
一派石亭赤土樓村航稻最盛而房之張坊至駱家莊涑
之高村及城之西北一路分渠引流具有條理又有王家
莊茂林莊毛家屯等村溝渠現存改爲旱田者約百餘頃
頃詢之土人僉言水之入涑者七入房塚者三故不足用
及訪涑則又以水源微弱爲辭此皆小民徂於因循不足
深信此河下流爲白溝水勢甚盛而附流之茨尾等河常